



INATSISARTUNI

Partii Inuit
Randi Broberg

UPA 2014/76-1
14.5.2014

**PILLUGU: Ulloq 1. januar 2015 aallarnerfigalugu ukiuni tulliuttuni sisamani KNR-mut
aningaasaliissutit qaffannissaannut Naalakkersuisut peqquneqarnissaannik Inatsisartut
aalajangiiffisassaattut siunnersuut. Aningaasaliissutit ilassutaat tusagassiortut
immikkut qaqlerilluni radiomi, tv-mi qarasaasiamilu nutaarsiassalerinermut
taamaallaat atorneqassapput.**

(Inatsisartunut ilaasortaq Andreas Uldum, Demokraatit)

Siunnersuutikkut ujartorneqarpoq KNR’imut aningaasaliissutit ukiut sisamat iluini 12 mio.
kr.’ninik amerlineqarnissaat.

Aningaasaliissutit taaneqartut qilersorneqassallutik, inuaqatigiinni pissutsinik itisilerilluni
tusagassiueraatsimik ingerlatsinermut. Tassungalu atasumik ukiut tamaasa KNR’i
aningaasaliissutit pineqartut ukiumi qaangiuttumi qanoq atorneqarsimanerannik
nalunaarusiortassasoq.

Partii Inuit erseqqissumik oqaatigissavarput, piffissaasorinnginnatsigu KNR’imut tapiissutinik
eqpartuinissaq.

Partii Inuit isumassaqartinnerungaarpalput KNR’i qanoq sukatigaasoq, sunik imalik sunillu
pingaartitaqarluni naleqartitaqarlunilu ingerlanneqarnissa, taamaammallu tamanna
naalakkersuinikkut tunngaviusumik isummerfigineqartinnagua aningaasanik
tunioraanginnarnissaq orniginngilarput.

Partii Inuit soqtigaarpalput, tusagassiuuteqarnikkut inuiattut pisinnaatitaaffitta
ulluinnarsiutaasumik unioqqutinneqartuarnerat unitseqqaarneqartariaqartoq.

Assersuutigiinnartigu tusagassiuuteqarnermut tunngatillugu uagut pisinnaatitaaffitsinnik
innarliineq;

- a) inuiattut pisinnaatitaaffigaarpalput, ingerlatsivitsigut inuiattut katersuuffitta suugaluarpata
uagut avatangiisitsinnik paasinitaatsitta atornissa piorsarsinnaanissaalu,
minnerunngitsumik eqqarsartaatsikkut qallikkullu kiffaanngissuseqarluta
ingerlaqqinniarnitsinni.

Ullumikkut KNR’ip sukaterneqarnerani, immikkoortuni siuttut danskiupput,
tusagassiortullu nunaqavissut inuttullu oqalussinnaasut anermik nutserisutut
arpattutullu siuttuminniit atorneqarlutik.



INATSISARTUNI

Ullumikkut KNR'i inuiattut killifitsinnut, pisariaqartitatsinnut, isumaqartitatsinnut soqutigisatsinnullu uniuuttumik ingerlanneqarpoq.

Partii Inuit allaat isumaqarpugut, KNR ullumikkut inuaqatigiinni pissaanerup qanoq agguataarneqarnissaanut soqutigisani, inuaqatigiinnut peqqinnanngilluinnartumik atuutsitsiniarsarisoq. Tamannalu piaernerpaamik unitseqqaartariaqarpoq.

Manna iluatsillugu Partii Inuit tikikkusupparputtaaq *KNR pillugu misissueqqissaarneq.*
Nalunaarusiaq, dec. 2012'imeersoq, IKINN'imit suliarititaq.

Tassani ilaatigut atuarsinnaavarput;

- a) TV'kkut aallakaatitat 10% KNR'ip nammineq tunisassiariigai. Naatsersuinermut ilangunneqarlutik *aallakaateqqitat.*
- b) TV'kkut aallakaatitsinernit danskit oqaasii atorlugit aallakaatitat 85%'iusut, inuttullu oqaatsit atorlugit aallakaatitassiat 15%'iusut.

Kisitsisit qiviaraanni, erseqqilluinnartumik takuneqarsinnaavoq, KNR'ip siunertaatut taaneqartut, takuuk radio tv'lu pillugit peqqussut nr. 6, 14. november 2004'meersumi § 20, eqqortinniarlugit naalakkersuinikkut sunnguamilluunniit suliniuteqartoqanngittoq.

Nalunaarusiami toqqaannartumik oqaatigineqarpoq, tassuunakkut inuiattut pingaartumillu meerartagut annaasaqartut – aamma oqaatsivut pillugit pisinnaatitaaffitta eqqortikkumaneqannginnerat peqqutigalugu.

Naggataarutigalugu Partii Inuit pisariaqarluinnartutut isigaarput, KNR'ip nutaamik nalilersuivigineqarnissaa. Nalunaarut qulaani taaneqartoq ilaatigut naapertorlugu, KNR annertuunik unammilligassaqarpoq, nutarteriffigineqarnissaalu pisariaqarluni.

KNR'ip siunissami sukatigaanermigut qanoq iluseqartariaqarnera pillugu, naalakkersuinikkut erseqqissaasariaqalerpugut.

Nalunaarusiami qulaani innersuussutigineqartumi KNR'ip sukatigaanermigut qanoq iluseqarsinnaanera pillugu periarfissatut taaneqarpoq;

- ullumikkutut KNR innuttaasunut sullissinissaminut pisussaaffeqarluni ingerlaqqissinnaasoq,
- tassanilu oqaatsivut tamakkiisumik atorlugit, tusagassiornerup iluani tunisassiortoqassasoq.



INATSISARTUNI

Partii Inuit pingaartipparput, oqaatsivut tunngavigalugit inerisaaqqinneq avaqqunneqarsinnaanngitsoq. Minnerunngitsumik sineriatsinni radio'kkut tv'kkullu tunisassiorfiit aamma eqqarsaatigalugit.

Naalakkersuisut innersuussutigaat, siunnersuut itigartitsissutigineqassasoq. Partii Inuit tamanna ilalernartipparput, KNR pillugu tunngaviusumik aaqqiissuteqarniarluni oqallinnerit iliuuseqarniarnerillu pingarnertut isigigatsigit.